



# Kembara Mahkota Johor jadi medan dekati rakyat

Oleh Mona Ahmad  
mona@bharian.com.my

**B**ERJIWA rakyat. Itulah gelaran yang sesuai diberikan kepada Canselor Universiti Tun Hussein Onn Malaysia (UTHM), Tunku Mahkota Johor, Tunku Ibrahim Ismail Sultan Iskandar yang sentiasa meluangkan masa mendekati serta mendampingi rakyat Johor.

Tanpa secalit pun rasa sombong dengan kedudukannya sebagai putera sulung Sultan Iskandar, Tunku Ibrahim Ismail sanggup turun padang mendengar sendiri keluh kesah dan penderitaan rakyat negeri Johor.

Setiap tahun sejak lebih 10 tahun lalu, Tunku Ibrahim Ismail tidak ketinggalan membawa bersama anakanda dan pembesar negeri berangkat untuk mengembara ke pulau, kampung pedalaman dan hutan belantara di negeri Johor.

Tahun ini, misalnya, aktiviti yang sama dilaksanakan dengan Kembara Mahkota Johor (KMJ) Jelajah Pedalaman 2009 ke-11, sejauh 1,030 kilometer melalui 10 daerah di negeri ini selama



empat hari, baru-baru ini.

Rombongan itu yang turut diiringi anakandanya Raja Muda Johor, Tunku Ismail Ibrahim dan 150 pegawai kerajaan menaiki 40 kenderaan pacuan empat roda.

Bagi KMJ tahun ini antara lain membawa mesej mengenai pemuliharaan hidupan liar dan hidupan air di negeri ini dengan mendekati terutama masyarakat Orang Asli yang segelintir membantu pemburu dan peniaga haram hidupan liar supaya tidak terus dipergunakan pihak tidak bertanggungjawab itu.

Tunku Mahkota dengan penuh prihatin juga mendengar permasalahan dan melihat pembangunan di kawasan pedalaman khususnya di kampung

Orang Asli dengan pegawai jabatan dan agensi kerajaan yang mengikuti KMJ akan mencatatkan permasalahan disampaikan masyarakat terbabit.

Setiap tahun, KMJ pastinya tidak mengecewakan rakyat. Mereka setia menunggu kunjungan putera raja yang berjiwa rakyat ini.

Penat dan keletihan rakyat hilang dan terubat selepas dapat bersalam dan menatap wajah anak raja kesayangan mereka yang sentiasa prihatin dengan masalah yang dihadapi.

Tunku Mahkota yang gemarkan kehidupan lasak dan mencabar sejak kecil bukanlah lambang putera raja manja dan tidak tahan lasak. Malah, kehidupan Tunku Mahkota diwarnai dengan hobinya yang lasak,

terutama polo. Menunggang kuda, menyelam, menembak dan sukan air antara kegiatan yang suka dilakukan putera sulung Sultan Johor ini.

Beliau sering menunjukkan kemesraan benar-benar menyentuh hati rakyat sekali gus merasai dipayungi keprihatinan istana.

Begitu juga dengan Tunku Ibrahim yang mengotakan janjinya untuk tetap meneruskan perjalanan kembara bermotosikal walaupun cuaca panas terik dan hujan.

Keprihatinan Tunku Ibrahim Ismail bukan hanya terhad kepada kebajikan rakyat jelata tetapi juga dalam semua bidang termasuk pendidikan.

Beliau amat mengambil berat mengenai pendidikan rakyat di Johor. Pelantikannya

sebagai Canselor Universiti Tun Hussein Onn (UTHM) membuktikan peranan mendalamnya dalam memastikan perkembangan pendidikan pengajian tinggi di negara ini.

Tunku Mahkota sering mengingatkan generasi muda supaya sentiasa bersyukur dengan kemudahan yang diberikan kerajaan bagi memastikan semakin ramai berjaya dalam bidang akademik.

Baginya, tanpa usaha berterusan melatih dan melahirkan tenaga profesional, hasrat untuk menjadi negara maju pasti tergendala.

Tunku Ibrahim Ismail adalah lambang putera raja yang prihatin, mesra, mudah didampingi dan berjiwa rakyat.

Tunku Ibrahim Ismail prihatin aspek kebajikan, pendidikan rakyat

